

Governu submete proposta OR ba PN ho valór Billaun \$ 1-resin

DILI, 27 abril 2022 (TATOLI)-Governu ne'ebé representa husi Ministru Finansa, Rui Gomes ho Ministru Asuntu Parlamentár no Komunikaun Sosiál (MAPKOMS) Francisco Jerónimo, kuarta ne'e, submete ona proposta orsamentu retifikativu (OR) 2022 nian ba Parlamentu Nasionál ho montante billaun \$ 1.129.

Prezidente Parlamentu Nasionál, Aniceto Longuinhos Guterres Lopes, maka simu direktamente proposta OR 2022 ne'e husi Ministru Finansa, Rui Gomes, iha Parlamentu Nasionál.

Rui Gomes hateten governu apresenta orsamentu retifikativu ba PN ne'e hodi finansia programa hamutuk 13 ne'ebé maka Governu aprova ona hanesan kriaun subsidiu ba veteranu sira, pagamentu subsidiu \$ 200 ba uma-kain sira iha fulan-dezemburu 2022 no seluk tan.

“Hanesan pagamentu \$200 ba uma-kain sira iha dezemburu ne'e, Ministériu ne'ebé tutela maka Ministériu Administraun Estatál (MAE), ida ne'e maka ita foin transfere sai,”Ministru Finansas Rui Gomes dehan.

“Ami apresenta mai iha ne'e, Parlamentu atu tetu maka adisionál no sub-plementu no osan sira ne'e ita sei tau hamutuk iha dotasaun todú Governu,” Nia esplika.

Iha fatin hanesan Prezidente PN, Aniceto Longuinhos Guterres Lopes, informa sei baixa ba Komisaun C Komisaun Especializada iha Parlamentu nasional hodi halo apresiasaun.

“Maibé Orsamentu Retifikativu ne'e Governu husu prioridade urjensia, entaun Parlamentu tenke apresia uluk pedidu urjensia ho prioridade ne'e,” nia dehan.

Governu husu ba PN atu halo diskusaun ho karakter urjensia, maibé meja Parlamentu Nasionál sei baixa ba komisaun especializada atu halo audensia ho lina ministerial sira antes haruka ba plenaria hodi halo diskusaun no aprovasaun.

“Ida ne'e tanba karakter urjensia parese lora ida ka rua ba debate jeneralidade, no lora tolu ka haat ba especialidade,”Prezidente Parlamentu Nasionál Aniceto Longuinhos Guterres Lopes hateten.

Tuir nia PN sei buka atu halo diskusaun ho karakter urjensia ba proposta ezekutivu ne'e hodi aprova antes mandatu Prezidente Repúblika Francisco Guterres Lú Olo ninia mandatu sei remata iha lora 20 fulan-maiu 2022.

Entretantu, proposta orsamentu retifikativu ne'ebé maka Governu submete ba PN atu finansia programa hamutuk 13 ne'e mak hanesan tuir mai.

- 1.Atribuisaun osan fulan da-13 ba kada família (esetu funsionáriu públiku sira);
- 2.Projetu Uma Kbiit Laek Plus;
- 3.Bolsu Estudu ba Mellór Graduadu Estudante Ensinu Báziku no Sekundáriu;
- 4.Kriaun Fundu Veteranu;
- 5.Programa Maun do obra ba Postu Administrativu (PEMOPA);
- 6.Hari'i Sede Arte Marsial no Rituál;
- 7.Programa Ensinu Distansia (Eskola iha Uma);
- 8.Internet gratis iha eskola sira;
- 9.Empregu ba mellór alunu universitariu sira;
- 10.Estabelesimentu Sekretariadu ba Assuntu Traballador Esterior no Komunitade Timoroan iha Diáspora;
- 11.Revitaliza kafé no subsidiu ba kafé Laku-teen;
- 12.Subsidu akomodasaun ba PNTL no F-FDTL;
- 13.Pagamentu ba diferenca remunerasaun PNTL nian ho rejime salariál foun, ho total benefisiáriu 4.096.

Enkuantu, antes ne'e montante tetu OJE 2022 ne'ebé Governu submete ba PN ho montante billaun \$1,675, ne'ebé millaun \$233 ba saláriu no vensimentu, millaun \$449,98 ba bens servisu, millaun \$565,9 ba transferénsia públika, millaun \$24,4 koresponde ba kapitál menór no millaun \$401,7 ba kapitál dezentvolvimentu.

Maibé liuhosi debate especialidade iha proposta adisionál mai ho propsota hamutuk 165 representante povu no hosi proposta hirak ne'e mak halo adisionál millaun \$300-resin, nune'e halo tetu OJE 2022 sa'e ba billaun \$2 tanba atu utiliza ba nesesidade povu no nasaun.

Governu Submete ba PN Proposta OJE Retifikativu 2022 ho montante billiaun \$1,1 hodi Finansia Medidas Komplementár 13

Díli, 27 abril 2022 – Ministru Rui Gomes, ohin lokraik, apresenta ona ba Parlamentu Nasionál, Proposta Orsamentu Jerál Estadu (OJE) Retifikativu 2022 ho montante total \$1.129.857.250. Proposta Orsamentu Retifikativu ne'e apresenta ba Parlamentu Nasionál ho karakter urjénsia.

Despesas tuir Klasifikasaun Ekonómiku

Ho Proposta Orsamentu Retifikativu ne'e signifika Reseitas Konsolidada Setór Públiku Administrativu sa'e ba \$3.234.522.481, enkuantu Despesas Konsolidada Setór Públiku Administrativu sa'e ba \$3.233.908.681. Reseitas husi Órgaun Servisu Administrasau Sentrá sa'e ba \$2.987.140.197, enkuantu Despesas Órgaun Servisu Administrasau Sentrá sa'e ba \$2.987.140.197, ne'ebé fahe tuir kategoria klasifikasaun ekonómiku hanesan tuir-mai ne'e: i) Transférénsia Públika ho montante \$1.837.634.189; ii) Bens no Servisu ho montante \$466.877.382; iii) Kapitál Dezentvolvimentu \$390.177.399; iv) Saláriu no Vensimentu \$250.537.130; no Kapitál Menór \$41.914.097.

Alokasaun Orsamentu tuir Medidas Komplementár 13

Proposta Orsamentu Retifikativu ho montante billiaun \$1,1 ne'e sei uza hodi finansia medidas komplementár hamutuk sanulu-resin-tolu ho nia detalla hanesan tuir-mai ne'e: i) Kriasaun Fundu Veteranu ho orsamentu alokadu billiaun \$1; ii) Atribuisaun Pagamentu Decimo Terceiro \$200 ba kada família (exzeptu funsionáriu públiku sira) ho orsamentu alokadu millaun \$70; iii) Uma Kbiit Laek Plus ho orsamentu alokadu millaun \$25; iv) Bolsa Estudu ba Mellór Graduadu Estudante Ensinu Báziku no Sekundáriu ho orsamentu alokadu millaun \$7,5; v) Programa Mão de Obra ba Postu Administrativu, millaun \$7,2; vi) Revitaliza kafé no subsidiu ba kafé Laku-teen ho orsamentu alokadu millaun \$6,4; vii) Pagamentu ba diferenca remunerasau PNTL nian ho rejime salariál foun, ba membru PNTL 4.096 ho orsamentu alokadu millaun \$5,1; viii) Harii Sede Arte Marsiál no Rituál millaun \$2,5; ix) Programa Eskola iha Uma ho orsamentu alokadu millaun \$2,1; x) Internet gratuita iha eskola sira, millaun \$1,1; xi) Subsidiu akomodasaun ba PNTL no F-FDTL ho orsamentu alokadu millaun \$1,9; xii) Estabelesimentu Sekretaria ba Asuntu Traballadór Esteriór no Komunidade Timoroan iha Díaspora \$500 mil; xiii) Empregu ba mellór alunu universitáriu sira \$437,5 mil.

Liuhusi Proposta Orsamentu Retifikativu ne'e, Governu propoin ba Parlamentu Nasionál atu halo reforsu finanseiru ba iha título Dotasaun Ba Governu Tomak no kria Programa Foun hanaran Medidas Orsamentu Komplementár. Ida-ne'e Governu halo atu labele bok ka muda estrutura orsamentu pur programa.

Horiseik, Konsellu Ministrus aprova ona Proposta Orsamentu Retifikativu ho ninia medidas konjuntu hamutuk sanulu-resin-tolu ne'ebé Governu apresenta ho intensaun atu redus impaktu ekonómiku ba Timoroan sira kauza husi situaun ekonómiku internasionál no aumentu substansiál taxa inflasaun ne'ebé sa'e ba beibeik. *

Jornalista: Natalino Costa Editór : Agapito dos Santos